

REGLUGERÐ

um viðauka við reglugerð nr. 56, 26. marz 1953 um mat
á frystum fiski til útflutnings.

1. gr.

Aftan við 1. mgr. 18. gr. reglugerðarinnar komi svo hljóðandi málsgrein:

Framleiðendur frystra krabbadýra og skeldýra skulu hafa sérstök vottorð frá Fiskmati ríkisins um það, að þeir fullnægi settum skilyrðum til framleiðslu, eins og segir í kafla I og II þessarar reglugerðar.

2. gr.

Aftan við reglugerðina komi svo hljóðandi viðauki:

Reglugerð þessi tekur einnig til frystra krabbadýra, (humars og rækju) og frystra skeldýra (hörpudisks, kúfisks, kræklings o. fl.) þar sem það getur átt við.

Við mat á frystri rækju skal hafa hliðsjón af gerlagróðri vörunnar. Gerlafjöldinn sé ekki meiri en eðlilegt getur talizt við góða meðferð, og rækjan fullnægi þeim gerlafræðilegu kröfum, sem gerðar eru til slíkrar vöru í því landi, sem hún er flutt til.

Reglugerð þessi er sett samkvæmt lögum nr. 55 2. maí 1968 um eftirlit og mat á fiski og fiskafurðum til að öðlast gildi 1. janúar 1971, og birtist til eftirbreytni öllum þeim, sem hlut eiga að máli.

Sjávarútvegsráðuneytið, 1. desember 1970.

Eggert G. Þorsteinsson.

Jón L. Arnalds.

3. desember 1970.

Nr. 263.

REGLUGERÐ

um alþjóðlegt fiskveiðieftirlit utan landhelgi og fiskveiðilögsögu.

1. gr.

Samkvæmt heimild í 3. málsg. 13. gr. alþjóðasamnings um fiskveiðar á norðausturhluta Atlantshafs, er gerður var í London 24. janúar 1959, hefur Fastanefnd fiskveiða á Norðaustur-Atlantshafi gert ályktun um alþjóðlegt eftirlit utan landhelgi og fiskveiðilögsögu til þess að tryggja framkvæmd samningsins og þeirra ákvæða, sem í gildi eru samkvæmt honum.

Efni ályktunar þessarar er birt í 5.—17. gr. reglugerðar þessarar.

2. gr.

Með orðinu „samningur“ í reglugerð þessari er átt við alþjóðasamning um fiskveiðar á norðausturhluta Atlantshafs, er gerður var í London 24. janúar 1959.

Með orðinu „samningssvæði“ er átt við það svæði, sem samningurinn nær til.

Með orðinu „samningsríki“ er átt við þau ríki, sem aðilar eru að samningnum.

Með orðinu „fastanefnd“ er átt við Fastanefnd fiskveiða á Norðaustur-Atlantshafi, sem starfar samkvæmt samningnum.